

QUÆSTIO MEDICA,

*Cardinalitiis disputationibus manè discutienda in Scholis
Medicorum, die Jovis duodecimâ Martii 1711.*

M. URBANO LEAULTE', Doctore
Medico, Præside.

An nutriendorum egrotantium alia quàm os via?

I.

GENERATUR corpus & nutritur. Nutritio perpetua generatio est. Functionis utriusque causa eadem, motus; materies eadem, sanguis. Utraque partium evolutio est. Nec nimio vetustatis amore delusus fingas ex seminibus efformari in utero partes, sanguine inde nutriri; quasi semen in generationem corporis, sanguis in ipsius nutritionem cedere valeat. Humor innominatus, ros, gluten, cambium, splendida verba. Ad populum phaleras corpus humanum septimo quoque anno in naturam planè diversam immutari? Hanc concipe generationis & nutritionis legem. In ovo creatæ partes continentur. Partium nomine tubulos & canales intelligas, non liquores in ipsis inclusos. Ubi seminali aurâ explicantur, generari; ubi à sanguine ampliantur, nutriri & crescere dicas. Non aliunde quàm à majori vel minori fluidi copiâ & elasticitate, incrementum aut decrementum repetas: continuò avolant sanguinis particulae illicò reparandæ. Hinc alimenti necessitatem probaverunt veteres, sentierunt neoterici.

PROXIMA nutritionis materies, sanguis: remota, chylus: remotissima, alimentum. Chylum intellige liquorem quemlibet, modò sanguinis naturam redolere possit. Nec albedinem semper in eo requiras antiquorum religiosior alumnus? Colorem indagare mittas? Chyli accidens est, non essentia. Nec vesti fidas? sanguis fiat? satis est. Ad hocce munus à naturâ destinata sunt organa: ore assumpta edulia, in ventriculi cavitatem delapsa, solo partium motu reciproco, ac tritura, absque ulla fermentationis ope dividuntur, atteruntur & comminuuntur, unde chylus. Hic in intestinis cum bile & succo pancreatico mixtus, ac dilutus, per venas lacteas, canalem thoracicum, ad cavam usque perducitur, in sanguinem immutandus. At, si hæc omnia desint, nùm alimenti penuriâ deficient partes? alia quæras naturæ præsidia, quibus sanguinis jacturæ reparandæ idoneus in vasa admittatur liquor? intentum habebis. Multiplici fidium genere instructum decet arcum in manu prudentis.

III.

NON ore solo corpus alimentum subit: docet fœtus nutritio. Non solæ venæ lacteæ in gracilioribus intestinis contentæ, non unus canalis thoracicus, cocta digestaque alimenta in molem sanguineam deferunt. Trita quidem & expedita via est: fatemur. Sed non una Appia via Romanam ducit. In Angina, in affectibus spasmodicis œsophagi, faucium, linguæ, in quibus ad ventriculum cibi potûsque omne præpeditur iter, pabulo depauperata rueret machina, nisi omnibus providisset natura prudentior. Quot eduliis ab ipsâ suppeditantur aditus? Vide-sis in crassioribus intestinis? En, adsunt vasa lactea. Adde quod, quor cutis pori,

quot venæ, quot vasa lymphatica, tot tramites, tot venæ lacteæ, tot canales quibus permittitur ad sanguinem ingressus? Perpetuò à centro ad circumferentiam per arterias advehitur purpureus latex; per venas datur à circumferentia ad centrum reditus. Hinc compertum habeas alimentorum alibiles partes venarum ostiola subire posse, ibique cum sanguine misceri. At, inquires, en alimenta, en semina, sed ubinam chylus? Deest *χυλώσεως* organum, ventriculus. Nec ille solus assumpta edulia in chylum vertit. Arte inchoabitur, perficietur sanguinis motu, partium tritu, aëris permixtione.

I V.

QUOT partes in corpore, tot ventriculos reciproco oscillationis donatos motu, sedulus veritatis indagator existimes? Hinc natura sagax singulis partibus genium & indolem sanguinis particulis subigendis indidit, ut circuitus motu, in quo generatio & nutritio præcipuè posita sunt, in ventriculi laborantis solatium venirent, ejusque adimplerent vices. Sic eadem & unicâ mechanices lege, quâ edulia semel in stomachum protrusa attenuantur & conteruntur, eadem quoque in quavis corporis parte, nullâ ventriculi actione prægressâ, similem *χυλώσεως μεταμώρφωσιν* patiuntur. Chylus enim à sinistro cordis ventriculo in vel remotissimas corporis partes propulsus, machinæ hydro-pneumaticæ sustentandæ ineptus omninò censeretur, nisi systallico unius cujuscumque canalis motu ulteriùs cundo perficeretur. At experientiæ cedat ratiocinium. Dubium & controversiam respuunt facta. Milites in annona aut uribus obsessis, omni alimentorum orbatî familiâ, solâ cum masticationis, tum ore ductionis tabaci ope, ad longum temporis intervallum illæsi vixerunt. Hinc patet ex ipsa ni-

cotiana nonnullas in molem sanguineam per inspirationem transmigrasse partes reparando sanguini idoneas. Quî etenim per tantam spatii intercarpedinem vitæ incolumes degisse potuissent? Quin etiam gratis odoribus recreatam facultatem naturalem aliquandiù subsistere omnibus notum est. Versatissimos insuper in arte consulas? Docebunt te sæpè sæpiùs se per triginta dies & ampliùs enematis, balneis, emplastris nutrientibus ægrorum naturam labascentem erexisse: ægotantem igitur variis modis nutriri posse discas?

V.

NON itaque ita gloriosè de se prædicet ventriculus? nec se solum partium omnium parentem & altorem dicat? Hoc à natura recepit munus: conceditur. Verùm ubi officio deest, non deest supplementum. Ars nonnunquam naturæ complementum est. Absque ipsius ope alimenta chyli indolem referunt. Ipsorum succus igne & aquâ digeritur. Stomachi vices gerit olla. Nec deficient viæ, ut purpureum laticem subeat elaboratus hicce chylus. Non desunt venæ lacteæ in crassioribus intestinis. Transitum præbent cutis pori; inspiratio. Non ergò evanescat salutis spes, si ventriculus impotens vel iners, si nullum os inter & canalem thoracicum interveniat commercium? Paretur balneum nutriens, jusculum per anum exhibeatur, deperditæ refarciuntur sanguinis moleculæ, sicque nova suppetabitur nutritionis materies.

Ergò nutriendorum ægotantium alia quàm os via.

Proponebat Parisiis JOANNES-BAPTISTA THOMAS
MARTINENQ Parisinus, Baccalaureus Medicus.
A. R. S. H. 1711.

Apud viduam Francisci Muguet Typographi Regis. 1711.